



Inatsisartunut ilaasortaq Tillie Martinussen  
Suleqatigiissitsisut  
-Maani

### § 37 naapertorlugu Naalakkersuisunut apeqqummut akissut

04-06-2018  
Sags nr 2018-11398.  
Akt nr. 7981552

Siullermik Inatsisartunut ilaasortaq Tillie Martinussen qujassuteqarfigaara naammagittaalliutinik suliat pillugit apeqquteqarmat.

Postboks 1160  
Tlf: 34 50 00  
Fax: 34 55 05  
3900 Nuuk

Aallarniutigalugu paasissutissiissutigineqassaaq naammagittaalliutit assigiinngitsut tulliuuttuni immikkoortiterneqassammata, tamatumani sulianik ingerlatsineq Nunatsinni Nakorsaaneqarfimmit, Peqqissutsimut Pitsaaliuinerimullu Aqutsisoqarfimmit aammalu Peqqissutsimut Naalakkersuisoqarfimmit isumagineqartarluni:

Email: [pn@naaq.gl](mailto:pn@naaq.gl)  
[www.naalakkersuisut.gl](http://www.naalakkersuisut.gl)

- 1) Nunatsinni Nakorsaaneqarfiup nunatsinni katsorsarneqarnermut atatillugu peqqinnissakkut suliat pillugit naammagittaalliutit tiguserpai aammalu Peqqinnissaqarfimmi Napparsimasut Maalaarutaannik Aalajangiisartunut naammagittaalliutit nassiuttarlugit.
- 2) Sullinneqarneq pillugu naammagittaalliutit peqqinnissaqarfiup qullersaqarfiani suliarineqartarput
- 3) Taarsiivigineqarnissamik qinnuteqaatit Peqqissutsimut Naalakkersuisoqarfimmi suliarineqartarput

Peqqinnissaqarfimmi siunnersorteqarnermik aqqissuussineq 1. december 2016-imi pilersinneqarpoq, tamatumani napparsimasut qanigisaasullu paasissutissinneqarsinnaallutillu ilitsersorneqarsinnaallutik, tassungalu ilanngullugu naammagittaalliorsinnaaneq pillugu ilitsersorneqarsinnaallutik. Peqqinnissaqarfimmi siunnersortip innuttaasunut, napparsimasunut qanigisaasunullu tamanut nappaatip suunera qanorlu katsorsarneqarnera apeqqutaatinnagu saaffiginnittut ilitsersorsinnaavai.

#### 1. A)

**Naalakkersuisut pilersaaruteqarnerlutik paasititsiniaanissaminut napparsimasut kiisalu ilaqqat qanigisaasut naammagittaalliorsinnaanerannut ilitsersuut pillugu, tassunga ilanngullugit napparsimasut peruluttut imaluunniit napparsimasut perululersinnaasut soorlu nappaassuarmik kræftimik napparsimasut allanillu peruluutigineqalersinnaasunik nappaatillit?**

Peqqik.gl-imi allassimasunik oqaasiinnakkullu paasissutissanik ilitsersuutinillu tamanut attuumassutilinnik pissarsisoqarsinnaanissaa Naalakkersuisunit pingaartinneqarpoq. Tassunga atatillugu oqaatigineqassaaq peqqinnissaqarfimmi siunnersorti 2018-imi

apriilimi Nuummi innuttaasunik ataatsimiisitsinermi peqataammat, tamatumani innuttaasut najuuttut apeqquteqarnissaminnut periarfissinneqarlutik, tassungalu ilanngullugu napparsimasut naammagittaalliorsinnaaneratt pillugu apeqquteqarnissamut periarfissinneqarlutik. Misilittakkat taakku aallaavigalugit pilersaaruteqarpoq Maniitsumi Aasiannilu innuttaasunik ataatsimiisitsinissani allani marlunni peqqinnissaqarfimmi siunnersortip peqataanissaa pilersaarutigineqarpoq.

**1. B)**

**Naalakkersuisut pilersaaruteqarnerlutik paasititsiniaanissaminnut napparsimasut kiisalu ilaqtut qanigisaasut tarnikkut napparsimasutut katsorsarneqartut naammagittaalliorsinnaanerannut ilitsersuut pillugu?**

Naammagittaalliorsinnaanermut ilitsersuut napparsimasunut nappaataat apeqqaatannagu tamanut naatsorsuussaavoq – 1 A-mi akissut takujuk.

**1. C)**

**Naalakkersuisut pilersaaruteqarnerlutik peqqik.gl pillugu paasititsiniaanissaminnut aamma tassani paasissutissat pigineqartut pillugit kiisalu periuseq "peqqinnissaqarfimmik oqaloqateqarneq" pillugu?**

Peqqinnissaq pillugu internetikkut isertarfik Peqqik.gl nassaariuminartuusoq aammalu Naalakkersuisut Nunatsinnilu Nakorsaaneqarfiup nittartagaanni innersuunneqartoq Naalakkersuisut naliliipput. Aammattaaq peqqinnissaqarfimmi sullinneqarneq aammalu peqqinnissaqarfimmi sullinneqarnerup pitsaassusiat (sullinneqarneq pillugu naammagittaalliutit) pillugit qanoq naammagittaalliteqarsinnaaneq pillugu Sullissivik.gl-imilu kommunit arlallit nittartagaanni paasissutissaqarpoq. "Peqqinnissaqarfimmik oqaloqateqarneq" ilitsersuinerup ilagaa pingaarutilik. Aamma takuuk 1 A-mut akissut.

**1. D)**

**1.A-mut, 1.B-mut aamma 1.C-mut tunngatillugu napparsimasut ullumikkut qanoq paasitinneqartarpat nittartakkami peqqik.gl-mi naammagittaalliorsinnaanermut ilitsersuut eqqaassanngikkaanni?**

**- Ataani atsiortup paasisimasai naapertorlugit ersernerlussinnaavoq naammagittaalliut qanoq ittoq sulianut qanoq ittunut tunngasoq apuunneqarsinnaanersoq, tamanna ersarissarneqarsinnaannginnerluni?**

Pisortat ingerlatsineranni suliassat suliarineqartarnerat pillugu Inatsisartut inatsisaanni nr. 8, 13. juni 1994-imeersumi § 7-imi aalajangersagaq naapertorlugu naammagittaalliutit suliarineqartarput. Nunatsinni Nakorsaaneq sullissineq pillugu naammagittaalliummik tigusaqaruni nunatsinni nakorsaaneqarfiup peqqinnissaqarfiup qullersaqarfianut naammagittaalliut nassiuttarpaa. Peqqinnissaqarfiup qullersaqarfia peqqissutsikkut katsorsarneqarneq pillugu naammagittaalliummik tigusaqaraangami

peqqinnissaqarfiup qullersaqarfiata naammagittaalliut nunatsinni nakorsaaneermut nassiuttarpaa. Innersuussutigineqarportaaq peqqinnissaqarfimmi siunnersorteqarneq pillugu siuliani akissut.

1. E)

**Innuttaasut akeqanngitsumik inatsisitigut ikiorneqarsinnaanerlutik imaluunniit allatut inatsisitigut ikiorneqarsinnaanerlutik naammagittaalliummik sananerminni Namminersorlutik Oqartussanut kommuninulluunniit annussassamik?**

**- Taamaattoqarsinnaassappat taava qanoq iliortoqassava?**

Innuttaasup naammagittaalliornermut apeqqutinut naliginnaasunut tunngatillugu peqqinnissaqarfimmi siunnersortimit ilitserorneqarsinnaavoq. Tamatuma saniatigut naammagittaalliorneqarnermut immersugassiaq ima ilusilersugaavoq naammagittaalliummik immersuinissamut innuttaasut ilitserorneqarlutik. Akeqanngitsumik inatsisitigut ikiorneqarsinnaaneermut atatillugu oqaatigineqarsinnaavoq innuttaasut isertitatik apeqquaatillugit inatsisitigut siunnersuisarfimmit Ikiumit akeqanngitsumik inatsisit pillugit ikiorneqarnissaminnut periarfissaqarmata.

2.

**Peqqinnissaqarfiup ingerlanneqarnera pillugu naammagittaalliuit pillugit agguaqatigiissillugu akineqarnissamut qanoq sivisutigisumik utaqqisoqartarpa - ukiut tallimat kingulliit eqqarsaatigalugit, tassani takuneqarsinnaalersillugu arlaatigut nikerartoqarsimanersoq.**

**- Tassunga ilanngunneqassapput kiffartuunneqarneq pillugu naammagittaalliuit aamma katsorsarneqarneq pillugu naammagittaalliuit.**

Aallarniutigalugu oqaatigineqassaaq peqqinnissakkut suliat pillugit naammagittaalliuit suliarineqartarnerat Nunatsinni Nakorsaaneqarfiup aammalu Peqqinnissaqarfimmi Napparsimasut Maalaarutaannik Aalajangiisartut akornanni ingerlanneqartarmat. Nunatsinni Nakorsaaneqarfik naammagittaalliutinik tiguisarpoq, suliat pillugit paasissutissiisarpoq aammalu susassaqtartunut ilisimatitsissuteqartarluni. Tamatuma kingorna suliaq napparsimasut isumannaallisaavigineqarnerat pillugu aqutsisoqarfianut (Styrelsen for Patientsikkerhed) nassiunneqartarpoq, taakkuupput Napparsimasut Maalaarutaannik Aalajangiisartunut allaffeqarfittut ingerlatsisut, tassanilu suliaq misissorneqarlunilu inatsisilerinermik suliaqartunit suliarineqartarluni. Suliat piffissami 2013-imit 2017-imit Nunatsinni Nakorsaaneqarfimmi tiguneqarnerminnit Peqqinnissaqarfimmi Napparsimasut Maalaarutaannik Aalajangiisartunit aalajangiiffigineqarnissaasa tungaanut piffissaq sulianik ingerlatsinermi atorneqartoq takussutissiami matuma kingulianiittumi takutinneqarpoq, imaallunilu:

<b>Piffissaq agguaqatigiissillugu atorneqartartoq qaammatinut naatsorsorlugu</b>	<b>Napparsimasut Maalaarutaannik Aalajangiisartut suliaat</b>		<b>Kisitsisit pingaarnerit</b>
<b>Qaammat aalajangiiffiusoq</b>	<b>Siulittaasoq</b>	<b>Aalajangiisartut</b>	
2013	18,1	21,3	19,5
2014	14,9	18,2	16,3
2015	11,3	15,0	12,9
2016	9,3	16,2	11,7
2017	13,4	16,5	14,3
<b>Agguaqatigiisillugit</b>	<b>13,4</b>	<b>17,9</b>	<b>15,1</b>

Takussutissiami takuneqarsinnaasutut ukiut kingulliit tallimat ingerlaneranni Kalaallit Nunaanni piffissaq sulianik ingerlatsiffiusoq agguaqatigiissillugu qaammatinik 15,1-inik sivilissuseqarpoq.

Oqaatigineqassaaq Napparsimasut Maalaarutaannik Aalajangiisartunut atatillugu siulittaasumit aalajangerneqartut imaluunniit aalajangiisartunit tamarmiusunit aalajangerneqartut immikkoortinneqartarmata. Tassunga atatillugu paasissutissiisutigineqarsinnaavoq siulittaasumit aalajangiivigineqartut tassaammata suliat isornartorsiutinik ilaqartinneqanngitsut. Suliat aalajangiisartunit tamarmiusunit aalajangerneqartut tassaapput piffissami naammagittaalliorfiusumi napparsimasup toqkkut qimagussimaneranut, suliami isornartorsiuisoqarneranut imaluunniit pissutsinut immikkut ittunut attuumassuteqartut.

### 3. A)

#### **Nakorsaaneqarfimmi piginnaasat suut aalajangiisuuppat innuttaasunik kiffartuussineq utaqqinertaqarpallaanngitsumik ingerlanneqassappat?**

Naammagittaalliutit pilertortumik suliarineqarsinnaaneranni piginnaassutsit assigiinngitsut pingasut pisariaqartinneqarput:

- Kalaallit Nunaanni peqqinnissaqarfimmik ilisimasaqarluarluni sulianik ingerlatsinissamut piginnaasaqarfiusumik allatseqarfeqarnissaq
- Oqaatsit aporfiutillugit pilertortumik eqqortumillu oqalutseqarlunilu nutserisoqarnissaq

- Peqqinnissaqarfimmi Napparsimasut Maalaarutaannik Aalajangiisartut sulianik aalajangiisinnaanerminni naammattunik paasissutissanik qulakkeerneaqsinnaaqqullugit peqqinnissakkut sulianik ilisimasaqarluarnissaq

Piginnaassutsit saniatigut naammattunik sulisoqarnissaq aamma pisariaqarpoq. Suliat naammagittaalliornermut tunngassutillit suli amerliartorput (takuuk takussutissiaq matuma kingulianiittoq). Takussutissiami takutinneqarpoq 1986-imit 2016-imit naammagittaalluutit amerliartornerat, tamatumani 2013-imi 2014-imilu amerlanerpaaffeqarlutik 103 aamma 100-inik amerlassuseqarlutik.

Tabeli 1 Table 1		Suliat Kalaallit Nunaanni peqqinnissakkut sullissisunik nakkutillinermut tunngasut (ukiuni tallimani agguaqatigiissitsineq) <i>Patients complaints relating to health care in Greenland (5 year average)</i>	
Ukioq Year	Ukiumut suliat nutaat New cases per year	Suliat ukiumut Nunatsinni Nakorsaaneqarfimmi aalajangiiffisat Cases decided in The National Board of Health per. Year	Suliat ukiumut Napparsimasut Maalaarutaannik Aalajangiisartunit aalajangiiffisat Cases decided by the Danish Complaints Board (DCB) / National Agency for Patients Complaints (NAPC) per. year
1986 – 1990	17	8	6
1991 – 1995	50	29	14
1996 – 2000	53	15	26
2001 – 2005	64	8	45
2006 – 2010	68	1.4*	55
2011	70	2*	0
2012	76	2*	15
2013	103	0	99
2014	100	2*	71
2015	82	0	44
2016	88	0	92

\* Sundhedsassistentit sulisullu naatsumik ilinniagallit Napparsimasut Maalaarutaannik Aalajangiisartut susasaqarfiinut ilaangitsut pillugit maalaarutit  
\* Complaints about health assistants and employees with little education who were not covered by DCB's competence

### 3. B)

Ukiut 5-10-t matuma siorna pissutsinut naleqqiullugu Ukiut tallimat kingulliit ingerlanerini sulisut qassit qanorlu ilinniagallit atorneqarnikuuppat napparsimasut naammagittaalliutaannik suliaqarneq eqqarsaatigalugu, tassani immikkoortillugit peqqinnissaqarfik Nakorsaaneqarfimmilu suliarineqarsimasut?  
- Naalakkersuisut pilersaaruteqarnerlutik naammagittaalliutit suliaqartartut nukinnik annertusaaviginarlugit?

Napparsimasut Maalaarutaannik Aalajangiisartut ukiuni kingullerni tallimani Kalaallit Nunaanni suliat 328-t aalajangiiffigaat, tamatumani ukiumut agguaqatigiissillugu suliat 66-it aalajangiiffigineqarlutik. Suliap pisoqalivallaarnera pillugu aalajangiiffigineqartut imaluunniit allanik pissuteqartumik itigartinneqartut amerlassusiat kisitsisinut taakkununga ilaatinneqanngilaq.

Agguataarneqarnerat ima inissitsiterneqarpoq:

<b>Suliat amerlassusiat</b>	<b>Napparsimasut Maalaarutaannik Aalajangiisartut suliaat</b>		<b>Katillugit</b>
<b>Ukioq aalajangiiffiusoq</b>	<b>Siulittaasoq</b>	<b>Aalajangiisartut</b>	
2013	43	32	75
2014	43	32	75
2015	26	19	45
2016	55	29	84
2017	35	14	49
<b>Katillugit</b>	<b>202</b>	<b>126</b>	<b>328</b>

Ukioq naallugu sulisorineqartut eqqarsaatigalugit paasissutissiissutigineqarsinnaavoq Napparsimasut Maalaarutaannik Aalajangiisartuni naammagittaalliutinik Kalaallit Nunaanneersunik sulianik ingerlatsisoq ataasiinnanngimmat marluunatilluunniit. Suliat ingerlanneqarnerat inatsisilerinikkut sulianik ingerlatsisunut arlalinnut agguataarneqarpoq. Maannakkorpiaq naammagittaalliutinik suliat sulisunut tallimanut agguataarneqarput. Ukioq naallugu sulisorineqarsinnaasut 1-1,5-inut missingerneqarsinnaapput. Tamanna ukiup siulianut atatillugu eqqortumik takussutissaasorinarpoq.

Aningaasanik sulisussanillu pisariaqartitsinerup malinnaavigineqarnissaa Naalackersuisunit pingaartinneqarpoq – tamannali naalackersuineramik suliaqartut oqallinneranni pingaarnersiunerannilu tamarmiusumi ilaatinneqartuaannarpoq.

### 3. C)

#### **Nakorsaaneqarfimmi atorfiit inuttalerneqarnissaannut ajornartorsiutit suummita aporfineqartarpat aamma siunissaq eqqarsaatigalugu?**

Kalaallit Nunaanni peqqissutsikkut sulisussarsiorneq piffissami sivisuumi ajornartorsiutaavoq. Tamatumalu ajornaannerulernissaa ilimagineqarnani. Nunatsinni Nakorsaaneqarfimmi peqqissaasutut atorfik siullerpaamik allanngortinneqarpoq inuiaqatigiinni nakorsaasersuineramik immikkut ilisimasalittut nakorsatut ilinniartutut atorfinngortinneqarluni. Atorfik 15. juli 2018-imi inuttalerneqartussatut naatsorsuutigineqarpoq. Anguniarneqartoq tassaavoq nakorsap ataatsip arlallilluunniit Kalaallit Nunaanni najugaqartut peqqissutsikkut suliat pillugit allaffissornermik tamatigoortumik isumaginninnissamut, tassungalu ilanngullugu Nunatsinni Nakorsaaneqarfimmik isumaginninnissamut ilinniartinneqarnissaat.

### 3. C)

**Naalakkersuisut isumaat naapertorlugu napparsimasut kiffartuunneqarnerat pillugu naammagittaalliutitut kiisalu napparsimasut katsorsarneqarnerat pillugu naammagittaalliutitut utaqqisarnissaq naammaginarloq qanoq siviisutigissava?**

Kiffartuussineq pillugu naammagittaalliutitut suliarinninnermi piffissap atorineqartatup sapinngisamik siviinnerpaanissaa kissaatiginartumillu qaammatit sisamat inorlugit siviisussuseqarnissaa Naalakkersuisunit kissaatigineqarpoq.

Katsorsartinneqarneq pillugu naammagittaalliutitut:

Inatsit maanna atuuttoq naapertorlugu Kalaallit Nunanani katsorsartinneq pillugu naammagittaalliutigineqarsinnaasut suussusiat ataasiinnaavoq, tassalu nakorsaq, peqqissaasoq peqqissaanermilluunniit suliaqartoq pillugu naammagittaalliorsinnaaneq. Danmarkimisuut katsorsartinnerup ingerlanneqarnera pillugu naammagittaalliuteqarnissamat periarfissaqanngilaq. Tamatuma kingunerisaanik inunnit assigiinngitsorpasuarmit oqaaseqaatinik pissarsiniartoqartariaqartarpoq. Tamanna pissutaalluni nakorsat annertuumik taarsaannerat naammagittaalliuteqartullu pisuni amerlasuuni aallarsimanagerat pissutigalugu sulianik ingerlatsineq arriillisarpoq. Taamaattumillu naammagittaallioriaaseq maanna atuuttoq atuutsillugu Nunatsinni Nakorsaaneqarfimmi suliat ingerlanneqarneranni piffissaq atorineqartoq maannatut sulii ukiup affaanik-ukiumik ataatsimik siviisussuseqartassasoq naatsorsuutigineqartariaqarpoq. Peqqinnissaqarfiup Napparsimasut Maalaarutaannik Aalajangiisartuini piffissaq sulianik ingerlatsinermut atorineqartoq siuliani oqaatigineqartutut ukioq ataaseq sinnerlugu siviisussuseqartarmat piffissaq sulianik ingerlatsiviususaaq tamarmiisoq ukiunik arlalinnik sulii siviisussuseqassasoq naatsorsuutigineqartariaqarpoq. Naammagittaalliutitut suliarineqarnera siviisunerpaamik qaammatinik arfinilinnik siviisussuseqartariaqartoq Naalakkersuisut isumaqarput, maannali naammagittaallioriaaseq atuutsillugu tamanna periarfissaqanngilaq.

### 4.

**Ukiut qulit kingullit ingerlaneranni innuttaasut naammagittaallioortut qassit ajugaanikuuppat, procentinngorlugu naatsorsorlugu?**

**Peqqissutsikkut suliat pillugit naammagittaalliutitut:** Skemami takutinneqarput ukiuni 2013-2017-imi procentikkaarlugit naatsorsukkat.

Ukioq aalajangiiffiusoq		Napparsimasut Maalaarutaannik Aalajangiisartut suliaat
2013		
Isornartorsiunerit		26,7%

Mianersoqqutitalimmik isornartorsiunerit		2,7%
<b>2014</b>		
Isornartorsiunerit		25,3%
Mianersoqqutitalimmik isornartorsiunerit		4,0%
<b>2015</b>		
Isornartorsiunerit		26,7%
<b>2016</b>		
Isornartorsiunerit		16,7%
Mianersoqqutitalimmik isornartorsiunerit		1,2%
<b>2017</b>		
Isornartorsiunerit		4,1%
Mianersoqqutitalimmik isornartorsiunerit		2,0%

**Sullissineq pillugu naammagittaalliutinut tunngasut:**

Peqqinnissaqarfiup qullersaqarfia kiffartuussineq pillugu naammagittaalliutit pillugit ukiut tamaasa nalunaarusiortarpoq.

2015-imi kiffartuussineq pillugit naammagittaalliutit

2015-imi sulianit 73-iusunit taakkunannga 37-t taparserneqarput. Taakkunannga 70 %-ii attaveqatigiinneq pillugu naammagittaalliutaapput.

2016-imi kiffartuunneqarneq pillugu naammagittaalliutit

Naammagittaalliutit tiguneqartut 70

Suliat naammassineqartut 48 (15 aatsaat  
2017 naammassineqarput)

Naammagittaalliutit tamakkiisumik ilaannakortumilluunniit taparserneqartut amerlassusiat 29



2016-imi sulianit naammassineqanngitsunit 22-iusunit suliat 15-it 2017-ip aallartinnerani naammassineqarput.

Sulianit 48-nit naammassineqartunit 18-it peqqinnissaqarfiup napparsimasullu akornanni attaveqatigiinnermut attuumassuteqarput. Suliani taamaattuni pineqarput peqqinnissaqarfiup neqeroorutai katsorsartinnissarlunniit pillugit paasissutissanik pissarsisimanginneq, peqqinnissaqarfimmi sulisut pissusilersornerat pillugu naammagittaalliutit aammalu naammagittaalliutit tamanut tunnganerusut napparsimasup peqqinnissaqarfiullu akornanni attaveqatigiinnermut tunngassutillit.

Peqqinnissaqarfimmi siunnersorteqarnermik aqqissuussineq 2016-imi decembarimi pilersinneqarnerata kingorna kiffartuussineq pillugu naammagittaalliutaasinnaasut ilarpassui peqqinnissaqarfimmi siunnersortimik oqaloqateqarnerup kingorna naammassineqartarput. Tamatumunnga ilaatigut pissutaasoq tassaavoq saaffiginninnerit ilarpassuisa paasissutissinneqannginnermut attuumassuteqarnerat, soorluttaaq napparsimasup peqqinnissaqarfiup sullississutai pillugit naatsorsuutigisaraluminit allaanerusumik pineqarnini pillugu naammagittaalliutinut attuumassuteqartut. Napparsimasup naatsorsuutigisai peqqinnissaqarfiup sullississutitut neqeroorutigisaanut naapertuuttuaannangillat.

Tamatuma saniatigut peqqinnissaqarfimmi siunnersortip innuttaasunit saaffiginnissutit misissorlugillu akissuteqarfigisarpai, tamannattaarlu innuttaasut sullississutit suunerannik paasinninnerata annertusinerannut tapeeqataasarpog.

2017-imi kiffartuussineq pillugu naammagittaalliutit amerlassusiata naatsorsorneqarnerat sulii naammassineqanngilaq.

2018-imi ukiuunerani piffissami qaammatinik pingasunik sivissuseqartumi naammagittaalliutinik suliaqartussat amigaatigineqarnerannik sunnersimaneqarpoq. 2017-imi kiffartuussineq pillugu naammagittaalliutit amerlassusiannik naatsorsuineq 2018-imi juunip naanerani naammassineqassasoq naatsorsuutigineqarpoq.

### **3. Naalakkersuisut pilersaaruteqarnerlutik nappaatinik paasinaasarneq nukittorsarniarlugu, immikkut isiginnilernermikkut aamma/ imaluunniit piginnaanernik amerliliinikkut - taamaassappat, qanormita qinersiviup maannakkut ingerlasup ingerlanerani?**

Paasissutissiissutigineqarsinnaavoq nunap immikkoortuinut aammalu Dronning Ingridip Napparsimmavissuanut ultralyd atorlugu atortunik nutaanik pitsaanerusunillu peqqinnissaqarfiup pisineratigut nappaatinik suussusersisarneq ukiuni aggersuni pitsangorsarneqassammat. Tamatuma saniatigut ilaatigut nunaqarfinni laboratoriami misissuinnermut atortunik immikkut ittunik pisinissaq pilersaarutigineqarpoq, taamaalilluni aaversinnikkut aseruuttoornernik antibiotikamik katsorsarneqartariaqartunik pilertornerusumik suussusersisinaanissaq kiisalu aakilliornermut pissutaasunik pilertornerusumik suussusersisinaanissaq pisariinneruleqqullugu.

Suliassaqarfiit arlallit eqqarsaatigalugit nappaatinik suussusersiniartarneq Danmarkimi nakorsat immikkut ilisimasallit qanimut suleqatigalugit pisarpoq. Attaveqatigiinnerlu pisarpoq telefonikkut, telemedicin atorlugu aammalu allanik periarfissaqartinnagu imaluunniit Kalaallit Nunaanni piginnaanilinnik amigaateqartoqartillugu napparsimasoq Danmarkimi misissorneqartussatut innersuunneqartarluni.

**4. A)**

**Kalaallit Nunaanni "second opinion"-p atorneqartarneranut tunngatillugu, tassa napparsimasup nappaataanik paasiniaaqqittarneq imaluunniit paasiniaaqqinngitsoortarneq eqqarsaatigalugu, taava napparsimasup inatsisitigut illersorneqarnera qanoq ippa, pisinnaatitaaffii qanoq ippat?**

Nappaatinik paasiniaaqqinnissamut napparsimasoq maannangaaq pisinnaatitaaffeqanngilaq.

**4. B)**

**Pisuni suni napparsimasut qinnutigisinnaavaat misissuisoqaqqinnissaa/ nappaatimik suuneranik paasisaqarneq nalilersorteqqissinnaavaat aamma/ imaluunniit susoqarsimannginnera tassunga ilanngullugu allamik ilisimasalimmut nakorsiarneq aamma sinaakkutit suut atorlugit?**

Pisuni nakorsamit allamit misissuisoqaqqinnissaanik naliliisoqaqqinnissaanillu napparsimasoq kissaateqaruni nammineq akiliilluni Kalaallit Nunaata avataani napparsimmavinnut namminersortunit ingerlanneqartunut saaffiginnissinnaavoq.

**4. C)**

**Tassani periutsit qanoq ippat aamma malittarisassat atuuttut suuppat?**

Siuliani akissut innersuussutigineqarpoq.

Inussiarnersumik inuulluaqqusillunga

Peqqissutsimut Ilisimatusarnermullu Naalackersuisoq

  
Doris J. Jensen